

摛藻堂四庫全書薈要

集部

欽定四庫全書叢要

集部

御選明詩卷一

詳校官原任事臣李斯咏



欽定四庫全書
御選明詩卷一

集部

御選明詩卷一

帝製

太祖皇帝

神鳳操

鈞天奏兮列丹墀俄翩翩兮鳳凰儀斂翔兮棲梧枝
彼觀德兮直為我辭

鍾山賡吳沉韻

嵯峨倚空碧環山皆拱伏遙岑如劍戟邇洞非茅屋青
松秀紫崖白石生玄谷巖畔毓靈芝峯頂森神木時時
風雨生日日山林沐和鳴盡啼鶯善舉皆飛鵠山中道
者禪隴頭童子牧試問幾經年答云常辟穀

又賡載安韻

旭日射山巖嵐光加翠色鳴鳳在高柯育雛傍崖側風
來楸葉紅寒雁起塞北江流護周迴天澄雲影碧磅礴
氣氤氳鴻濛太古積靈秀峙差峩仰瞻常晨夕倚天來

何時孰謂題名籍朱湖洞中仙蟠桃徑一尺

賡僧韻

天台五百尊方寸皆明月月影彌千里江何曾有暫歇爲
斯妙用通今古長不滅昔當懸挂時誠非凡可越住世
及應真幾度阿僧刦假錫作梯航泛海濤如雪一旦杳
無踪暫與沙門別儻忽羣禪中孰能爲機泄禪心曠無
跡如海亦何竭僧本具他心宗門常合轍

寶光廢塔

寶塔摩青蒼招提歲久荒秋高樓俊隼夜深月影長寂
寂星搖蕩飛霞入棟梁守僧都去盡螢火作燈光鬼哭
思禪度遺經風日張獨有來巢燕呢喃似宣揚停驂傷
古意雲合草頭黃聞說當年盛鐘魚徹上方

春日鐘山行

我愛山松好雲埋常不老幾度春風吹更綠勝似蓬瀛
羨三島石徑聞蕊馨流泉嫩春草草青啼鳥澗邊幽玄
鶴摩空來晨早錦衣隊列出山阿飲客婆娑歸更飽山

清水清我亦清有秋足我斯民寶

鶯嘯皇州

絮飛鶯嘯柳垂青春雨過時天正晴新澗水流聞鼓韻
舊崖松埽聽琴聲神州氣象寰中盛天闕風光世上明
猶有上林花似錦殿階仙樂鳳笙鳴

大祀

晨駕旌旄列隊行龍旗遙映鳳城明護霜雲外天顏碧
籠水烟邊山色青新歲野郊春氣靄今朝村市曉晴生

鞠躬稽首參天處四海謳歌賀太平

聞人嶺南郊行

極目山雲雜曉烟女蘿遙護嶺松邊陸行盡服嵐霞氣
水宿頻吞虬蜃涎晨仰際峯觀擁日暮看臨海泊來船
信知百越風塵異黑髮人居不待年

詠南越

邊邑深隍嵌疊峰土民食粟扣時春雲山深水常相合
烟樹藤蘿每自封嶺外瘴橫鳴蟋蟀海濱鬱熱顯鷁鯨

常思不律皆由此數月朱顏別舊容

竹榦青樂釣

曠浦澄天濕曉烟智人樂釣穩沙前蓑輕雨霽雲收谷
釣擲綸樞水映船舉棹欲歸江月上掛帆已近暮霞邊
汀蘆處處飛烟火照徹漁村欲不眠

盧汀洲隱浦

泛入遙江漸渺茫蘆花飛落雪飛揚天邊雲影浮舟靜
村外秋光列鴈行覓隱誰知棲所在用心無處不籌量

盧生避世深幽跡故入滄浪野水鄉

牧羊兒土鼓

羣羊朝牧遍山坡松下常吟樂道歌土鼓枹時山鬼聽
右泉濯處澗鷗和金華誰識仙機密蘭渚何知道術多
歲久市中終得信叱羊洞口白雲過

巨罟叟漁魚

悠悠江靜日和暄迴水歌聲度藹烟漁網布時天上曬
布帆張處斗移邊風恬喜目遙山嫩岸濕頻看邇草鮮

薄暮欲歸星月上流螢點點近船舷

橫秋風吹笛

西風木落綻黃花牛背村童笛正佳曾識倚樓人聽處
每聞吹月鶴昇遐蒼江一色渾秋意紅葉初光襯晚華
露冷下天星斗潤烟波聲到是誰家

莽蒼叟歌山

仰目巍峯柱上穹千巖萬壑盡玲瓏玄猿嘯月丹崖側
紫燕摩天碧漢中樵牧往來雲樹裏牛羊歸去霧烟東

山中人物常歌道歲歲年年莽蒼翁

春山新水

山雲颺韻節初暄景色清明春水漣谷鳥喜鳴花沐雨
巖猿悅躍樹籠烟仙家麥飯雲蒸熟旅館薇羨氣育鮮
最好滿川渾似錦漲溪新水印晴天

僧目空山

孤寂淒淒一徑微處心應與世塵違朝觀松鶴摩天去
暮見巖猿挽樹歸瓶水一爐香滿座錫鐸丈室氣盈衣

空山僧對知何日化作蒼龍挾雨飛

雲衲野人

山人修道幾經年
聞說餐松足意便時以斷雲完故衲
日將流水灌新田
常勤侶鶴巖崖下寂靜儕猿烟霧邊
欲訪未知何處住
料應霞舉已成仙

鍾子煉丹

翠微高處渺青烟
知子機藏辟穀堅丹鼎鉛砂勤火候
溪雲巖谷傲松年
潭龍掣電深淵底
崖虎風生迴洞邊

逕已告蒙人未履昂霄足躡斗牛天

新月

誰將玉爪指長空萬里山河一樣同映水有鉤魚怯釣
銜山無箭鶴疑弓清光未放雲霄外素影遙分宇宙中
輪滿待逢三五夜九州四海照無窮

賜都督僉事楊文廣征南

大將南征膽氣豪腰懸秋水呂虔刀雷鳴甲胄乾坤靜
風動旌旗日月高世上麒麟真有種穴中螻蟻竟何逃

大標銅柱歸來日庭院春深聽伯勞

咏雪竹

雪壓竹枝低雖低不著況明朝紅日出依舊與雲齊

春望牛首

遙岑峙立勢蒼然春日鶯啼景物鮮疊嶂倚天江月外
三山映帶石城邊

新雨水

片雲風駕雨飛來頃刻凭看遍九垓檻外近聆新水響

遙穹一碧見天開

又賡吳詰韻

時近清和氣愈濃雨催花實喜晴風籬邊點點如錢大
盡是青青間綠紅

又賡宋璲韻

清和未至尚春風花幕園林似錦紅細雨只教成子速
蕊飛彩蝶最多功

山頂白雲

山椒極目白雲崇
壯色繽紛百丈松
新水潺巖聞鼓韻
女蘿遙似洞門封

詠李白早發白帝城

謫仙東下入瞿間
一葉扁舟日日還
聞說衝濤千尺浪
兩江極目盡皆山

詠李白舟下荊門

布帆高掛映長空
且喜新秋冷露風
數日輕舟歸似箭
須臾繫柳泊吳中

雪詩賡曹文壽韻

翩翩飛舞布田垓似絮還疑玉蕊梅一夜撲窗春蝶戲
好風吹去又推來

又賡張翼韻

臘前三白曠無涯應是天公降六花九曲河深凝底凍
張騫無處再乘槎

遊鍾山

鍾山陽谷梵王家帝釋臺前優鉢花遊戲但聞獅子吼

比丘身衣錦袈裟

思老試壯

因過雕鞍見馬肥迎風振鬣試霜蹄試將舊日弓彎看
箭入弦來月樣齊

成祖皇帝

勅況長寧鎮國山詩

炎海之墟渟泥所處煦仁漸義有順無忤悽悽賢王惟
化之慕導以象胥邁來奔赴同其婦子兄弟陪臣稽顙

闕下有言是陳謂君猶天遣其休樂一視同仁匪偏厚
薄顧茲鮮德弗稱所云浪舶風檣實勞懇勤稽古遠臣
順來怒趨以躬或難矧曰家室王心亶誠金石其堅西
南蕃長疇與王賢矗矗高山以鎮王國饒丈於石懋昭
王德王德克昭王國休寧於萬斯年仰我大明

賜太子少師姚廣孝七十壽詩二首

壽介逃虛子者年尚未央功名躋輔弼聲譽藉文章畫
靜槐陰合秋清桂子香國恩期必報化日正舒長

王露滋芳席奎照碧空斯文逢盛世學古振儒風未
可還山隱當存報國忠百齡有餘慶寫此壽仙翁

仁宗皇帝

陽春曲

遲遲麗日照春空陣陣芳塵花信風依依弱柳含嬌翠
爛爛夭桃埋淺紅黃鶯飛上花間語似勸遊人邀酒侶
醉燒銀燭作夜遊瞬息桃花落紅雨

冬至日賜右春坊贊善梁潛

侍從有佳士朝端期得人夙昔自卿至接見情益親旦
夕資論納豈獨詞華新仲冬風日暄和氣如陽春湛湛
樽中酒歡然對良晨

冬至賜贊善徐好古

清朝盛文治輔德資儒耆念彼筋力倦趨朝諒非宜賦
詩有佳致納誨多良規起予得深趣歡懷浩無涯新陽
屆初復况此承平時酬勞有尊酒庶以勞期頤

桃園春晚

曙光猶未分芳園露華滋碧桃千萬樹鮮妍如錦絢隔
林鶯語滑兩兩間關轉掖垣將啟扉漏箭傳聲遠花底
候宮車更覺東風軟

上元觀鼇山詩

盛時調玉燭佳節粲華燈象緯當黃道鼇峯擁帝京金
蓮春放早寶月夜同明聖壽天長久謳歌樂太平

早朝

淡月低鵝鵠祥雲遶建章金門森羽衛寶鼎靄名香日

上東方曙風輕曉殿涼千官朝退後諮詢接賢良

江樓秋望

遠碧接天涯登臨景自佳蘋洲晴亦雪楓岸晝常霞落鴈過前浦浮鷗傍淺沙竹籬高曬網茅屋是漁家

秋風

玉律轉清商金飈送晚涼輕飄梧葉墜暗度桂花香月
下生林籟天邊展鴈行吹噓禾黍熟萬頃似雲黃

池亭納涼

夏日多炎熱臨池憇午涼雨滋槐葉翠風過藕花香舞
燕來青鎖流鶯出建章授琴彈雅操民物樂時康

宣宗皇帝

思賢詩

有序

予嗣守祖宗大位夙夜兢惕思惟致治之道必有
賢臣相與贊輔雖屢詔求賢然恭默之思未已乃
作詩以著予志詩曰

天命有赫付畀萬方肆予承之夙夜弗遑亮天之工其

責在予亦惟求賢以作心膂堯舜大聖容於臣鄰湯武
致治敷求哲人稷契皋夔周召伊傅同德一心以匡以
輔惟時匡輔百工允釐治效之隆臻於皞熙悠悠我心
念之勿置欲得羣賢以弼予治告言懃惄束帛箋箋命
彼皇華歷於丘園庶幾多才技茅連茹奮其功庸翼我
王度惟天昭昭維嶽降靈篤生賢哲聿馳駿聲啟心沃
朕以迪先德揚其耿光有永無斁

猗蘭操

有序

昔孔子自衛反魯隱居國中見蘭之茂與衆草伍
自傷不逢時而託為此操予慮在野之賢有未出
者故擬作焉

蘭生中谷兮奕葉其芳賢人在野兮其道則光嗟蘭之
茂兮與衆草為伍嗚呼賢人兮汝其予輔

祖德詩

恭惟我仁祖躬備大聖德天性稟純粹溫恭而允塞篤
志在仁義兼亦貴稼穡寶玉之所藏山川被光澤

維時屬構屯猷畝之自適進退與道俱玉德懷貞白皇
天鑒昭晰寶命所繇錫篤生太祖聖配天立人極
海內如鼎沸土壤分割析蒼生靡怙恃俛伏斃毒蟄仗
劍起濠梁奉天極焚溺再駕定東南一舉下西北
曠哉六合內腥穢悉蕩滌三光復宣朗五典重修飭遠
齊堯舜功近過湯武績遂令普天下休養樂生息
太宗削姦回維統奠宗祏聖文既炳煥神武尤赫奕賢
才盡登用秉德各修職庶邦承覆載貢獻來九譯

昭考撫盈成至仁弘隱惻民安視如傷恭已臨萬國繼
志與述事夙夜懷兢惕皇風益清穆皇道彌正直

正本所自隆仁祖實啟迪祥源深且廣天派肆洋洋溢聖
神肇傳序茂衍萬世厯造商本玄王興周美后稷

茲予嗣鴻業時幾謹申飭四聖赫在天悠久貽法式保
佑賴深眷負荷愧餘力稽首陳咏歌庶用示無斁

賜許廓巡撫河南

河南百州縣七郡所分治前歲農事缺旱潦始復繼衣

食既無資民生曷由遂顧予位民上日夕懷憂媿爾有
敦厚資其往勤撫字徙者必輯綏饑者必賑濟諮詢必
周歷母憚躬勞勸虛文徒瑣碎所至皆實惠勉旃罄乃
誠庶用副予意

憫農詩示吏部尚書郭璡

農者國所重八政之本源辛苦事耕作憂勞亘晨昏豐
年僅能給歉歲安可論既無稼穡肥安得綈絮溫恭惟
祖宗法周悉今具存遐邇同一視覆育如乾坤嘗聞古

循吏卓有父母恩惟當慎所擇庶用安黎元

示戶部尚書夏原吉

閩中歲屢歉民食無所資郡縣既上言能不軫恤之周禮十二政散貨首所宜給帛遣使者發廩飭有司臨軒戒將命遄往無遲遲命下苟或後施濟安所期吾聞有道世民免寒與饑循已不遑寧因請書媿詞

捕蝗詩示尚書郭敦

蝗螽雖微物為患良不細其生實蕃滋殄滅端匪易方

秋禾黍茂芃芃各生遂所忻歲將登奄忽蝗已至害苗及根節而况葉與穗傷哉隴畝植民命之所繫一旦盡於斯何以卒年歲上帝仁下民詎非人所致修省勿敢怠民患可坐視去螟古有詩捕蝗亦有使除患與養患昔人論已備拯民於水火曷哉勿玩悞

減租詩

官租頗繁重在昔蓋有因而此服田者本皆貧下民耕作既勤勞輸納亦苦辛遂令衣食微曷以贍其身殷念

惻予懷故跡安得循下詔減十三行之四方均先王視
萬姓有若父子親茲惟重邦本豈曰矜吾仁

憫旱詩

亢陽久不雨夏景將及終禾稼紛欲槁望霓切三農祠
神既無益老壯憂忡忡餧粥不得繼何以至歲窮予為
兆民主所憂與民同仰首瞻紫微籲天撾精忠天德在
發育豈忍民瘼痘施霖貴及早其必昭感通翹跂望有
渰冀以蘿疲癃

草書歌賜程南雲

有序

朕幾務之餘游心載籍及徧觀古人翰墨有契於懷嘗賦草書歌以寓意焉以爾日侍之勞書以賜之

草書所自何所授初變楷法為章奏當時作者最得名崔瑗杜度張伯英三人真蹟已罕見後來繼之有羲獻筆端變化妙入神逸態雄姿看勁健風驚電掣浮雲飛蛟龍奮躍猛虎馳漢晉草法千載師張顛藏真亦絕奇

一代精藝才數輩遺墨千人萬人愛固知頓挫出腕力
亦用飛動生神采古來篆籀今已謗何況隸草謗愈多
吾書豈必論工緻誠懸有言當默識

招隱歌

吾觀天地化育功四序五行實任之軒轅堯舜致熙皞
亦有六相兼舉夔君臣共濟自往古大夏豈是一木為
况予涼薄資九五承大寶四海之廣兆姓繁側席仁賢
翼王道長林大澤高丘巨壑豈無懷才抱德者蕭散幽

閑樂其樂扣舷清歌弄綠水結巢雲松招白鶴雲松蒼
蒼白鶴飛翠蘿搖曳春風時朝鏡黃獨夕茹紫芝放歌
考槃什吟詠梁父詞如玉在璞韜其輝天之生才將有
為屢下求賢詔明珠寧無遺中夜有懷起待旦勞心容
求忘日晏嗟爾賢人何樂空谷有莘幡然起畝畝傳巖
何嘗終版築磻溪白首還鷹揚臥龍亦復興南陽旱歲
人間望霖雨大川利涉需舟航嗟爾賢人無為徘徊石
泉麋鹿非爾伍風雨天路為爾開脫却芰荷衣挂在青

澗隈翩翩命駕蒲輪來黃金如山築高臺待爾為咏臺
與菜無為令我悵望思難哉

喜雪歌

一冬晴明人不厭臘月雪飛尤所喜從古農占重三白
來年有秋預可擬昨夜長風廣莫來號空捲地初停雷
斯須漫漫撒玉屑千樹萬樹梅花開天地平鋪皆一色
光輝未數瓊瑤白四山蒼翠不可尋但見凌空聳銀壁
憑高四顧真奇觀日上扶桑朝不寒昔人勞農享臘惟

此時更說來年豐有期村村腰鼓聚宴飲庶幾時平今
見之嗟予菲德臨九五燮理功能寄丞輔舉觴相樂拜
天庥永念皇天與皇祖

山水圖歌賜長春真人劉淵然歸南京有序

長春真人劉淵然事太祖皇帝太宗皇帝仁宗皇
帝以至於朕凡歷四朝闡玄元之妙著感通之功
撝恭秉誠老而逾篤今已耄年志存閑佚辭歸南
京朕重其去也因取孔子仁智壽樂之旨援筆作

山水圖賜之而題詩其端以寓所以曖厚於老成
之意云

東華之東湛明景彩霞環繞蓬萊境瓊芝瑤草春不窮
丹光夜動黃金鼎淵然老仙崆峒客萬里歸來此棲息
手持如意青芙蓉兩臉潮紅頭雪白頭上玉琢冠身中
雲繡衣朝朝飛神馭天超汗漫直上太清朝紫微腰間
騰龍雙寶劍秋水光晶寒激灑嘯風呼霆作霖雨屢注
仙瓢蘇下土功成斂用歸希夷玄天至道本無為眼看

民患忍坐視恤人亦體天之慈旦來謝別何匆匆騎鶴
逕度江之東江東龍蟠虎踞五雲表鍾山翠接三茅峯
茅家兄弟青冥上白日駿鸞定相訪還來赤松子亦有
安期生上朝南極壽昌星好山好水清且明西方出金
桃南斗斟雲液長生有曲舞且歌年過廣成千二百

綠竹引賜都督孫忠

薊門八月霜華濃何時種竹能成叢鳳城之陽禁苑東
琅玕萬樹凌青空光搖太液波心月高出三山頂上松

祥飈拂拂來天上鳴金戛玉聲玲瓏蓬萊宮中日如年
高柯密葉霏雲烟春陽挺秀百花表秋月增輝仙桂邊
九夏繁陰覆靈囿祥麟瑞鶴相周旋六花凝寒羣卉老
清標轉覺生光妍軒皇昔日初製律截筒來自崑崙谷
江心磻石桃竹枝斬根剥皮誅紫玉何如蓬萊宮中竹
雨露偏多生意足盤根固節千萬年遠勝猗猗淇水澳
上林花木熙青春靈芝瑞草爭芳芬愛此蒼蒼太古色
竹邊幾度停遊輪世云鳳皇食竹實又云鳳皇棲竹枝

鳳笙九奏太平曲鳳兮鳳兮今來儀予將拭目而觀之

太液池送黃淮辭政

天香早折仙桂枝筆花五綵開鳳池蓬萊之仙直奎璧
近侍九重天咫尺永樂聖人臨御初鞠躬稽首陳嘉謨
仁宗監國文華殿左右謀猷共羣彥朕承大寶君萬方
相與共理資賢良傾心寫情任舊老而卿引疾先還鄉
五歷星霜復相見霜鬢蕭蕭秋滿面是時朝旭光升紫
殿明相對清言良慰情留之累月未盡意歸心又欲東

南征太液清泠涵碧藻楊柳笑容相映好鳬鷺灑鵝弄
清波紫霧紅雲拂瓊島芳殼在俎酒在壺工歌鹿鳴續
白駒君臣大義古所重心雖庭闈身江湖鴈蕩峯高高
不極中有謝公舊遊跡採芝劚苓可長年應在天南憶

天北

喜雪歌賜兵部尚書張本

天氣肅肅當嚴冬大地凜冽號朔風扶桑曜雪韜瞳曨
屏翳一色浮鴻濛斯須素影搖太空霏花移葉何茸丰

六出巧自造化工覆纊敷縞遠近同綴瓊貼璐緣牆墉
輕盈宛轉穿簾櫳千門萬戶光玲瓏積平坎窔增丘封
凍合溝瀆流靡通林沼幻出銀芙蓉遂令松篁失青葱
翰飛蠕動寂斂蹤萬幾之暇坐九重豈不自足鮮與醜
一念所重存瘳恫荷戈披甲防鹵戎况復懷此為冲冲
維時預兆年歲豐滋潤麰麥消螟螽騰歡溢喜畝畝農

瀟湘八景畫

瀟湘夜雨

濃雲如墨黯江樹九疑山迷天色暮蒼松巖下客維舟
魚龍鼓舞飛烟霧但見長空風雨來勢與雲夢相周迴
三湘淋漓瀉銀竹七澤洶湧翻春雷長江橫絕巴陵北
一水悠悠漾空碧洪濤巨漲頃刻中虹橋隐隐無人迹
前溪遙見野人家槿籬茅屋半欹斜高樓誰得江湖趣
坐聽瀟瀟對燭花隔浦鐘聲來遠寺曉色蒼涼喜開霽
青天萬里白雲收滿目湘山翠欲流

洞庭秋月

洞庭秋水清徹底岳陽城頭月初起巴山落影半湖陰
金波倒浸芙蓉翠須臾素景當瑤空寒光下燭馮夷宮
雲夢微茫冰鑑裏沅湘浩蕩玉壺中霜華初飛風浪息
萬籟無聲夜光寂彷彿湘靈汙漫遊虹橋直跨天南北
但見鷗汀與鷺洲折葦寒沙帶淺流縞衣綸巾湘中老
高歌取醉岳陽樓回看月下西山去湖水悠悠自東注
洞庭咫尺西南陬赤岸銀河萬里秋

山市晴嵐

茅屋幾家山下住長橋遙接山前路湖天雨過曉色開
滿市晴嵐帶烟樹遠山近山杳靄間村前村後相彌漫
浮藍積翠久不散懸崖滴露松梢寒湘市老人頭半白
琴僕從容隨杖鳥林外青帘賣酒家山殼野蔌漁樵客
洞庭春來湖水生君山到處花冥冥波光澄涵橫素練
樹色掩映開銀屏撫景徘徊看未足颯颯天風滿林麓
何人獨倚岳陽樓長笛數聲山水綠

平沙落鴈

秋江水落波痕淺平沙渺渺連天遠白蘋紅蓼滿瀟湘
枯葦黃蘆迷漢沔鴻鴈恒憐澤國游數聲忽報楚天秋
萬里邇寒違朔漠幾行帶雪下汀洲雲水微茫少矰繳
歲歲南來歡有托霜田豈乏稻粱謀江村自得棲遲樂
黃鶴樓前鐵笛鳴時驚嘹噭兩三聲湖通巴蜀寒煙淨
天接荆衡暮景澄嗟爾迢迢自荒服慕戀中華生計足
行當懋德覆羣生盡使洪纖皆發育

遠浦歸帆

斜陽欲掛晴川樹丹霞遠映瀟湘浦洞庭湖上接星沙
萬里歸舟自何處雲帆縹渺天際來勢壓滔天雲浪催
須臾已達漢江曲江聲洶湧如鳴雷漢陽城頭夜吹角
暫從鸚鵡洲邊泊長笛一聲山月低殘燈數點江雲薄
西蜀滇南與海通浮波來往自無窮暮天已捲三湘霧
曉日還懸七澤風突兀危樓看江水臨眺何人頻徙倚
寒鴉飛盡淡烟收浩蕩遙空淨如洗

漁村夕照

岳陽城頭望湘浦芳草垂楊迷古渡晴嵐霏白夕陽紅
渺渺江村天欲暮漁家茅屋住汀洲罷釣歸來穩繫舟
自念生涯在網罟臨風高挂向船頭出水鮮鱗雜紫蟹
鑪頭有酒還堪買東鄰西舍當此時歡笑聲餘歌款乃
豚魚吹浪白連天隔江賈客促歸船餘光遠映雙鳬外
殘影半落孤鴻邊湖上高樓雲外起下瞰湖湘千百里
憑高一望楚天低雲樹蒼蒼暮山紫

烟寺晚鐘

烟光漠漠春山紫古寺深藏萬松裏夕陽西墜羣壑陰
隔林藹藹疎鐘起瀟湘無風波浪停恍如水底鳴長鯨
山僧策杖歸來晚遙聽穿雲百八聲緩急因風如斷續
遠徹山阿并水曲已隨暮角響江城更送樵歌出林麓
乘橋二客心悠然偶立遙看瀑布泉高山流水有深意
咫尺不聞音韻傳乾坤無塵萬籟靜朗然空谷聲相應
高秋正遇曉霜清分外若向豐山聽

江天暮雪

大江東去天連水薄暮蕭蕭朔風起須臾吹却凍雲同
六花亂撒滄波裏橋南橋北樹槎牙隔浦紛紛集晚鴉
馬嘶百折蟠雲路犬吠孤村賣酒家俯仰山川同一色
眼前不辨浪花白茫茫七澤與三湘分明皓彩遙相射
漁翁獨酌寒江濱頃刻瓊瑤飛滿身得魚醉唱湖南曲
款乃一聲天地春有時倚棹弄長笛洞庭景物清無敵
中流迢遞望君山但見遙空聳銀壁

瑞香花詩

有序

瑞香花有數種或紅或白或紫春早盛開芬馥可
愛蓋唐宋人多有賦詠之者予亦見之短篇云

瑞香花葉如織其葉非一狀花開亦殊色或如瑪瑙之
殷紅或如玉雪之姿容或含淺絳或深紫細瓣疊葉芬
玲瓏臘後春前花未放先春獨占梅花上繞枝芳意露
毡毳萬卉千葩總相讓瞳曨旭日照階墀澹蕩香風拂
面時初疑沉檀爇寶鼎亦似蘭麝熏入衣瑞香花樹高
三尺強山桃野杏動踰丈得以幽叢約馥香

水亭偶成

臨流亭館淨無塵落澗松泉處處聞半濕半乾花上露
飛來飛去嶺頭雲翠迷洞口松千箇白占林梢鶴一羣
此地清幽人不到惟留風月與平分

樂靜詩

暮色動前軒重城欲閉門殘霞收赤氣新月破黃昏已
覺乾坤靜都無市井喧陰陽有恒理斯與達人論

四景

錄二首

水影虛涵一鏡中
晴光搖蕩暖雲紅
小桃花重初經雨
弱柳絲柔屢舞風

暑雨初過爽氣清
玉波蕩漾畫橋平
穿簾小燕雙雙好
泛水閑鷗箇箇輕

幸史館

天命余躬撫萬方
丹心切切慕虞唐
退朝史館諮詢處
回視文星爛有光

過史館

蕩蕩堯光四表巍巍舜德重華祖考萬年垂統乾坤六

合為家

上林春色

山際雲開曉色林間鳥弄春音物意皆含春意天心允
合吾心

詠撒扇

湘浦烟霞交翠剡溪花雨生香埽却人間炎暑招回天
上清涼

英宗皇帝

漢江歌賜襄王

漢江滔滔出嶓冢兮偉茲巨浸壯南邦兮萬有千里流
無窮兮逶逶迤迤志必東兮於戲漢水殆與天地同始
終兮

憲宗皇帝

闕里孔子廟詩

天生孔子縱之為聖生知安行仁義中正師道興起從

游三千往聖是繼道統流傳六經既明以詔後世三綱
五常昭然不替道德高厚教化無窮人極斯立天地同
功生民以來卓乎獨盛允集大成實天所命有天下者
是尊是崇曰性聖道曷敢勿宗顧予眇躬承此大業惟
聖之謨於心乃愜用之為治以康兆民聖澤流被萬世
聿新報典之隆尤在闕里廟宇巍巍於茲重美文諸貞
石以光於前木鐸遺響於千萬年

孝宗皇帝

閼里孔子廟詩

聖人之生天豈偶然命之大君俾贊化權二帝三王君
焉克聖繼天立極道形於政大化既洽至治斯成巍巍
蕩蕩渾乎難名周政不綱道隨時墜孔子聖人而不得
位乃稽羣聖乃定六經萬世之師於焉足徵自漢而下
數千餘歲襄典代加有隆無替於皇吾祖居正體元六
經是師卓爾化原列聖相承先後一揆逮及朕躬思弘
前軌廟貌載崇祀事孔禋經言典訓彌謹彌敦俗化治

成日升川至斯道之光允垂萬世

靜中吟

習靜調元養此身此身無恙即天真周家八百延光祚
社稷安危在得人

武宗皇帝

賜大學士楊一清致仕還鄉

時光疾箭催人老先後恩榮世間少雖然私第保餘年

每日心懸侍天表

鑾輿幸第

車駕親臨茂祉堂
璽書高掛耀龍章
昇平宴罷明良會
盛事流傳萬載香

攔門勸酒

歡飲醺醺出相門
勞卿再四勸金尊
南征已定旋師旅
去暴除殘第一人

上馬留題

正德英名已播傳
南征北勦敢當先
平生威武安天下

永鎮江山萬萬年

世宗皇帝

饗太廟禮成賜張元

戊子新正吉春饗祖廟親祀事忻已成肅駕迴宮宸登
輦偶一顧輿南一輔臣貌竒真才傑形端氣志伸外焉
秉真一內則抱忠純誠正輔吾躬清白飭乃身予喜荷
天眷賚賢作邦楨庶幾皋夔輩望以康斯民

御經筵講大學衍義有感賦此

帝王所圖治務學當為先下作民之主上乃承之天致
治貴有本本端化自平人君所學者其序有後前正心
誠其意志定必不遷吾志既能定理道豈復顛身修本
心正家國治同然國治乃昭明萬邦斯協焉於變帝堯
典思齊文王篇萬國修身始朕念方拳拳

賜賈詠詩

卿本中州俊簡在登台衡君臣際良難所貴德業并朕
固亮卿志夙夜懷忠貞卷阿有遺響終聽鳳皇鳴

秋日即事詩送元輔張羅山

拂暑金風動袞裳
滿天商吹送新涼
農家萬寶收成後
十里遙聞禾黍香

神宗皇帝

畫眉山龍王廟碑詩

有序

畫眉山龍王廟在都城西一舍其地故有泉潭相傳以為龍之所居即其旁為廟祀龍王焉成化壬辰憲宗純皇帝禱雨有應新其廟而勒辭于豐碑

萬曆十有三年春夏不雨麥稼焦枯以五月往禱
于廟浹旬之間嘉澍屢霑郊野霑足三農忭舞爰
出內帑金錢重增葺之為之記而系以銘詩

於赫龍王不顯其光上下帝旁噓翕無方為雷為霆為
雲為雨有開必先靡求不與我求伊何黍稷稻梁爾與
伊何千倉萬箱眉山之下龍王之宇迄用康年穀我士

女

鄒縣景命殿詩

翼翼京邑瀟水濼之璇源遠濬載奠坤維尊靈長樂歡
洽重闈絲絲景命百祿咸宜瞻茲湯沐啟瑞集禧周原
膾膾寶殿攸基重門邃閣崇敞逶迤仁祠左拱靈宇右
麗甍連棟接鳥革翬飛虹祥式闡慈念載怡爰及薄海
耀景咸熙聖母之德綏此蒸黎百千萬祿永永無隳

勸學詩


斗大黃金印天高白玉堂不因書萬卷那得近君王

莊烈皇帝

賜石砫土司秦良玉

蜀錦征袍手製成桃花馬上請長纓世間不少奇男子
誰肯沙場萬里行

御選明詩卷一



總校官庶吉士臣侍朝
校對官檢討臣蕭九成
謄錄舉人臣傅瓊芳

欽定四庫全書叢要

集部

御選明詩卷二

詳校官原任主事
臣李斯咏



欽定四庫全書
會要卷一萬八千五百二

集部

御選明詩卷二

宗藩詩

宗室

附

周定王櫓

元宮詞

大安樓閣聳雲霄
列坐三宮御早朝
政是太平無事日
九重深處奏簫韶

春日融和上翠臺
芳池九曲似流杯
合香殿外花如錦

不是看花不敢來

東風吹綻牡丹芽
漠漠輕陰護碧紗
向晚內園春色重
滿闌清露濕桃花

合香殿倚翠峯頭
太液波澄暑雨收
兩岸垂楊千百尺
荷花深處戲龍舟

閨闥門前擁鉞旄
千官侍立曉星高
尚衣欲進虬龍服
錯捧天鵝織錦袍

侍從常向北方遊
龍虎臺前正麥秋
信是上京無暑氣

行裝五月載貂裘

瑞氣氤氳萬歲山碧池一帶水潺湲殿傍種得青青豆
要識民生稼穡喜

燈月交光照綺羅元宵無處不笙歌太平宮裏時行樂
輦路香風散玉珂

玉京涼早是初秋銀漢斜分大火流吹徹洞簫天似水
半釣新月挂西樓

五色雲生七寶臺小山子上數峯排奇花異草香風度

不是天仙不到來

蜜漬金桃始獻新禁城三伏絕囂塵炎蒸微至清寧殿
玉杵敲冰賜近臣

月明深院有霜華開遍階前紫菊花涼入繡幃眠不得
起來窗下撥琵琶

珊瑚枕冷象牙牀耿耿青燈伴月光不是宮闈有仙境
如何覺得夜偏長

金風苑樹日光晨內侍鷹坊出入頻遇著中秋時節近

剪絨花毯鬪鵠鶩

金鴨燒殘午夜香
內家初試越羅裳
芳容不肯留春駐
幾陣東風落海棠

側側輕寒透鳳幃
夜深前殿按歌歸
銀臺燭爐香銷鼎
困倚屏風脫舞衣

小樓春淺杏花寒
象鼎煙銷寶篆殘
情思不忺梳洗嬾
半偏雲髻倚闌干

年年避暑出居庸
北望灤京朔漠中
經過縉雲山水秀

吳姬疑是越江東

鬼赤遙催駝鼓鳴短簷檀帽傍車行上京咫尺山川好
納鉢南來十八程

清曉龍闈侍寢回鬟鬆雲鬢對粧臺綺窗昨夜東風暖
一樹梨花對雨開

奎章閣下文詞盛太液池邊遊幸多南國女官能翰墨
外間鈔得竹枝歌

大都三月柳初黃內苑羣花漸有香小閣日長人倦繡

隔簾呼伴去尋芳

諸方貢物殿前排名得鷹坊近露臺清曉九關嚴虎豹
遼陽先進白鶲來

秋深飛放出郊行選得駒駒內裏乘野雉滿鞍如綴錦
馬前珍重是黃鷹

春情只在兩眉尖嬾向粧臺對粉盒怕見雙雙語鶯燕
楊花滿院不鈎簾

健兒千隊足如飛隨從南郊露未晞鼓吹聲中春日曉

御前咸著只孫衣

纖纖初月鵝黃嫩淺淺方池鴨綠澄內苑秋深天氣冷

越羅衫子換吳綾

內中演樂教師教凝碧池頭日色高女伴不來情思懶

海棠花下共吹簫

大宴三宮舊典謨珍羞絡繹進行厨殿前百戲皆呈應

先向春風舞鷓鴣

萬籟顏色熟櫻桃樹底青青草不薅生怕百禽先啄破

護花鈴索勝琅璈

穀雨天時尚薄寒梨花開謝杏花殘內園張蓋三宮宴
細樂喧闐賞牡丹

曉燈垂燄落銀缸猶自春眠近小窗喚醒玉人鶯語滑
寶釵敲枕理新腔

周憲王有燉

竹枝歌

春風滿山花正開春衫女兒紅杏腮儂家蕩槳過江去

爲問阿郎來不來

巴山後面竹雞啼巴水前頭沙鳥栖巴水巴山到郎處
聞郎又過石門溪

柳枝歌三首

蘇小門前萬縷垂白家園內兩三枝聽歌看舞人何在
惟有東風展翠眉

三月風和散麴塵枝枝垂地每傷神為君繫得春心住
忍折長條送遠人

宛轉千條胃晚風拖煙帶雨渭城東征衫點得輕輕絮

寄入陽關曲調中

和白香山何處難忘酒六首

何處難忘酒年光似擲梭清明憐已過春色苦無多席
上紅牙板花前皓齒歌此時無一盞爭奈牡丹何

何處難忘酒初秋暑尚存雙星渡銀漢微月照黃昏瓜
果排中間笙歌沸小軒此時無一盞何以待天孫

何處難忘酒遙登庾亮樓歌聲通上界笑語在瀛洲玉

宇晴無際冰輪夜不收此時無一盞何以玩中秋

何處難忘酒重陽戲馬臺菰蒲隨水落橘柚待霜催蟋蟀吟將老茱萸插幾回此時無一盞黃菊向誰開

何處難忘酒寒窗一局碁新箚開竹葉老樹發梅枝撥火煨霜芋圍爐詠雪詩此時無一盞虛度小春時

何處難忘酒深冬掩鳳幃管絃清曉發獵騎夜深歸羊角旋風起鶩毛大雪飛此時無一盞辜負黑貂衣

擬不如來飲酒四首

世態看來熟浮生何苦忙好花供老眼佳茗刷枯腸池
上紅駕並簾前紫燕翔不如來飲酒高卧北窗涼
莫入三街市宜乘九夏涼隨緣得妙術守分是仙鄉寫
字騰龍虎吹簫引鳳凰不如來飲酒爛醉錦箏傍
羨我霜髯老逢時正太平園畦頻點檢書畫悅心情綠
竹栽些箇紅棋著一枰不如來飲酒且莫問輸贏
幸喜身康健休論愚共賢詩聯有神助老嬾得天全十
日一風雨三家百頃田不如來飲酒同樂好豐年

秋涼

蒼涼初日照簾櫳秋氣清高八月中滿砌寒蛩啼冷露
一天新鴈度西風病懷得酒如春暖老眼看花似葉紅
獨坐小軒無箇事悶來聊復理絲桐

秋蟬

敗柳疏林寄此生涼時不似熱時鳴蛻形先覺金風動
輕翼偏嫌玉露清抱葉常如經雨態過枝猶帶咽寒聲
桑間此際螵蛸老游息安閑莫漫驚

小亭即景

小亭西畔畫樓東開遍階前芍藥叢梅子雨乾還有雨
挾花風過更無風喜看池內魚生子驚退簾前燕逐蟲
坐久忽聞黃鳥語綠楊深處午陰中

雲英詩

雲英何處訪遺踪空對陽臺十二峯花院無情金鎖合
蘭房有路碧苔封消愁茶煮雙團鳳縈恨香盤九篆龍
腸斷端清棲閣裏墨痕燭焰尚重重

偶成

駸駸病骨覺清癯心上清閑百事無曉起灌園呼內豎
畫長臨帖寫官奴宜人景物隨時好垂老風情得自娛
且進一尊花下酒便拚微醉不須扶

芸閣初夏即事

玉堦槐影綠陰陰長日清閑罷撫琴滿架茶簾如散雪
一畦萱草似堆金詩因中酒多隨意摹為饒人不用心
芸閣晚涼清興發免毫新試寫來禽

宮詞

屏掩春山夜漏長秋來處處有新涼一天明月星河澹
滿殿風吹茉莉香

綠腰琵琶

四面簾垂碧玉鈎重重深院鎖春愁綠腰舞困琵琶歇
花落東風懶下樓

蜀獻王椿

送方希直先生還漢中

岷山峩峩江水決決我疆我理俾我以康靡言匪依靡
善匪得閨士孔多我敬希直侍我經筵不倦以勤非德
不言非道不陳職思其歸義不可奪采采者芹伺教如
渴爰秣其馬爰振其衣拜手稽首載辭而歸昔者之來
春日遲遲維今之歸涼風淒淒悠悠我心念子良苦爰
命詞臣飲餞江滸王道如砥既歌且詠八月初吉抵于
南鄭沔彼江漢亦合而流瞻彼岷峩其相繆心之知
矣臨別縕縕子如我思道豈云遠

讀基命錄

武皇稱汲黯近古社稷臣卓乎天地間百世有餘芬宋
公廊廟姿志慮殊精純由來慕前烈願學在斯人雖處
江湖遠擬欲踐臣鄰苟非堯舜道肯向黼宸陳嘗笑賈
太傅前席對鬼神著述累萬言所言皆歸仁為君觀此
書四海屬經綸為臣觀此書有術能致君聖賢友多聞
我亦忝嘉賓持此以贈我讀之至夜分撫卷再三歎良
可比典墳

湘獻王柏

太和山尋張三丰故居

張玄玄朝飲九渡之清流暮宿南巖之紫煙好山浩劫
知幾度不與景物同推遷我來不見徒悽然孤廬高出
古松頂第有老猿接臂相攀緣

遼簡王植

暮春

鞍馬辭京去維時已暮春殘花留舞蝶飛絮逐行人樹

暗啼黃鳥波濶躍紫鱗白雲晴冉冉瞻望重思親

秋江

楊柳渡頭煙漠漠峨眉山下水悠悠月明沙渚晚風急
漁笛一聲江上秋

寧獻王權

囊雲詩

蒸入琴書潤黏來几搨寒小齋非嶺上弘景坐相看

宮詞

閨闥雲深鎖建章
曠曠旭日射神光
紫宸肅肅開黃道
萬歲聲聲拜玉皇

樓閣崔嵬起碧霄
微聞仙樂奏簫韶
天風吹落宮人耳
知是彤庭正早朝

宵旰常存為國心
大庭決政每親臨
退朝鎮日憑繩几
御筆常書丹宸箴

銀潢斗轉挂疎櫺
翡翠窗紗夜未扃
三弄琴聲彈大雅

一簾明月到中庭

忽聞天外玉簫聲
花下聽來獨自行
三十六宮秋一色
不知何處月偏明

十二銀屏十二峯
一峯一箇繡芙蓉
東風吹醒陽臺夢
人在珠簾第幾重

昨夜梅花漏早春
和香和月弄精神
休教玉笛三更奏
驚起含章夢裏人

暖日烘晴淑氣嘉
春風先發上林花
鶯朋燕友時相得
似識東城帝子家

霽天旭日敞金扉和氣氤氳滿禁闈寶殿晝長簾幕靜

牡丹花下蝶交飛

太液池中翻翠荷小娃學唱采蓮歌畫船不繫垂楊下

盡日隨風漾碧波

寶妝蟬鬢蟬金翹露下銅盤月影遙春思逼人眠未穩

閑開碁局度清宵

秋來處處搗衣聲小院梧桐月正明促織絮寒霜氣白

隔牆誰弄紫鸞笙

玉闌干外木犀開應是西風昨夜來宮女不知清露重

折花偷插鳳凰釵

庭梧秋薄夜生寒誰把箜篌別樣彈睡覺滿身花影亂

池塘風定月團團

柳色偏承雨露恩也將青眼暗窺人可憐不解東風意
仍把柔條綰舊春

杏雨紛紛滿逕穿簾燕補落花泥銜將春色歸巢去

辜負鶯兒枝上啼

庭樹團團作翠陰夜涼清話坐更深無端感起閑愁思
彈到梅花月滿琴

鮀魚窗冷夜迢迢海嶠雲飛月色遙宮漏已沉參倒影
美人猶自學吹簫

重簾不捲下瓊鈎戶戶迎風雪打頭時有笑聲來別院
故知宮女夜藏闌

寒蛩唧唧草間鳴喚出新秋無限情霜露滿天紅葉老
有人愁聽搗衣聲

新選昭儀進御來女官爭簇上平臺宮中未識他名姓
都把花名作字猜

寂寂重門夜沉寥天風時送御香飄三十六宮秋月白
美人花下教吹簫

誰翦吳江一幅綃巧裁宮樣縷金袍妖嬈偏稱腰肢小
每向龍墀侍早朝

月奩金鏡綺窗寒雲母屏開五色鸞寶篆有香椒辟靜
一簾紅雨杏花殘

楚莊王孟烷

九峯寺

細路千盤迴高峯九疊奇松陰深入寺泉脉遠通池雲
鎖禪棲室巖鐫御製碑來游乘暇日林下盡幽期

魯靖王肇輝

江樓秋望

百尺危樓上憑高極杳冥水雲連楚白島嶼入淮青潮
起魚龍窟風生蒲蓼汀倚闌凝佇久目斷是滄溟

秋日江行

策馬行行出郭遙平沙水落未生潮楓林兩岸經霜老
紅葉無風落小橋

魯惠王泰堪

春晴

膏雨初收日載陽眼前景物富韶光碧池一夜水平岸
紅杏數枝花出牆芳草不隨蓂莢換游絲欲共柳條長
海棠庭院偏明媚莫遣東風又作狂

魯莊王陽鑄

塞上逢故人

久厯風霜鬢欲華
故人相憶各天涯
幾年出塞常為客
今日逢君似到家
薄酒暫宜酬雪月
敝衣堪歎染風沙
明朝又恐河梁別
愁聽江城奏暮笳

秋日閑居

地僻柴門靜不開
明窗虛室絕塵埃
應無酷吏催租到
忽有白衣送酒來
坐聽風聲敲翠竹
吟看日影上蒼苔

乘閒歲月心無累客至須留泛酒杯

江樓秋望

江城秋暮葉初飛獨上高樓望夕暉忽見一行沙鴈起
西風遙送片帆歸

秦康王志燦

送名醫凌漢章還苔

術傳盧扁字鍾王底事來遊便趣裝熟路也知車載穩
清時何用劍生鏹雞鳴函谷三更月楓落吳江兩岸霜

歸到苔溪尋舊侶畫船詩酒水雲鄉

秦簡王成泳

楊白花

楊白花隨風無定止飄然一去太無情飛度江南幾千里可憐落水化浮萍浮萍無復隨風起宮中美人連臂歌此情不斷如春水

釣天曲

飛遊鬱羅境稽首東王公開軒臨法座置酒燕靈宮紫

雲歌玉女瓊漿酌金童揮刀麟脯細入筋鸞膏空鳳簫
聲嫋嫋鼉鼓鳴蓬蓬投壺起天笑吹律回春融燕罷百
神散樂闋萬舞終歸來倚餘醉憑虛馭剛風

春游曲

新柳迎游騎飛花趁酒甌年年三二月爛醉曲江頭

武功道中

五原三畤隔西東此地人言是武功楊柳池塘科斗水
杏花村店酒旗風農耕綠野春臺裏客在青山罨畫中

日暮官程催去馬樹頭微雨正濛濛

春詞

海棠枝上鵲聲乾羅幙重重護曉寒初日半林珠露重
脆紅無數倚闌干

題王舜耕圖

翠壁丹崖淡夕曛往來麋鹿自成羣仙家住在空青外
只隔桃花一片雲

楚憲王季塊

衡山

衡山高峩峩根盤幾百里危峯插層霄巨岳奠南紀空
中紫蓋峯有若芙蓉蕊欲泛洞庭舟瀟湘正秋水

唐成王彌鍤

久雨

春雨同秋雨輕寒作峭寒鶯聲猶謇澀花片漸摧殘宿
霧難開日層波正湧瀾韶華寧久戀轉眼惜春闌

唐恭王彌鉗

宮詞

長門芳草綠茸茸輦路年來草漸封怪殺海棠花上月
夜深偏照繡幃重

潘安王詮銖

登樓懷古

大火西流漸屬金
登樓懷古獨傷心
秦城已廢烽煙息
晉嶺空高草木深
落日鴉聲依遠樹
殘更螢點聚疏林
英雄回首皆黃土
獨有寒雲鎖暮岑

春日有懷

小圃辛夷漸發芽禁城殘柳欲飛花最憐九十春光去
未遂還家只夢家

藩憲王肩移

枕上

展轉殊無寐秋深感二毛城鴉催曉色庭樹起寒濤往事
意何拙浮生心自勞河間今已矣寧不愧吾曹

和懶雲上人韻

幽徑斷行踪浮圖對遠峯結冰堅碧沼凝雪老青松雙
樹下開講千燈中現容天空雨花遍門有白雲封

送汪內史南歸

滄江遠渚暮煙收南望千山樹色秋明日別君漳水畔
相思還上驛西樓

秋鴈

北來征鴈下寒塘水食沙眠足稻粱不寄行人一封信
却因何事到衡陽

德平榮順王肩旋

贈別素愚上人

釋子來何處，廬山復太行。
翻經淹歲月，補衲犯冰霜。
劫塵緣盡彌天覺，路長智珠元不染。
好去照殊方。

送焦明府之鳳翔

馬首蠶叢路，茲行亦壯遊。
天青三峽曉，雲碧萬山秋。
鷺浴盤渦水，猿啼古驛樓。
君才非百里，早晚夢刀州。

瀋宣王恬校

寄懷大司馬郭公

早歲論交即見知
幾年良晤信難期
停雲北極頻回首
落木西風獨賦詩
金鼎鹽梅殷相業
玉階劒履漢官儀
秋高選將清邊徼
畫省憂心退食遲

秋興

池閣蕭條竹逕通
閑來幽興檢詩筒
未須絃管翻新曲
自有琴尊對晚風
斜日斷雲簾影外
疎林落葉杵聲中
悲秋莫話當年事
且向遙天數塞鴻

山行

為訪林棲叟何妨石逕長白雲生谷口處處藥苗香

賦得聞鶯送客

隔市炊煙曙色遲小城初霽客來時嬌鶯嚦嚦啼芳樹
不解東風有別離

鎮康王恬焯

同呂二人話別

此會情何極明朝遽別筵霜清楓葉路秋老菊花天百

越家鄰海三垂地近邊相思應有賦月定幾回圓

安慶王恬熾

贈別玉峯上人

關山去迢遞飛錫有誰同行苦三乘裏心開萬法中定
回雲滿搨偈後月低空相憶聽鐘磬冷然度曉風

夏夜寄懷謝山人時客汾陽

良夜孤清賞懷君倍黯然離居三歲似明月幾回圓紫
塞雲邊樹青山雨後天相思寫不盡寂寞有冰絃

聞砧

何處砧聲急空閨入夜聞哀音流素月寒響徹秋雲夢
斷盧龍遠天高白鴈分誰能將妾意萬里報夫君

藩定王琨堯

擬古宮詞

君王退早朝走馬長門左朱樓十二重未啟黃金鎖春
陰畫閣寒坐撥沉香火

落葉

林塘寒雨後撼撼下秋棚綠已隨衰草黃仍綴斷藤高
枝全見月低鳥暗窺燈不隔東窗曉幽居愛早興

春日遊柏谷山寺

蠶扇堪乘興徘徊捫薜蘿天臨丹嶺近山入白雲多鳥
道無方軌龍湫有暗波何時值野老長嘯出重阿

天外聞清梵晨光滿翠微杖藜蒼蘚滑斲藥紫參肥松
偃雲垂蓋花分露濕衣一僧能話古去住轉忘機

和恒齋舅答程太守見貽韻

高懷少塵鞅貰酒訊山居閑幕蟲絲下秋盤鮓菜餘雨
寒新菊吐霜晚故林疎滿架多絅帙清談任卷舒

山行

丹地轉嶙峋山寒未覺春枯藤懸古木獨鳥咤行人崖
斷才分逕雲低欲拂巾漸看天路近下界積微塵

寄題林慮山趙煉師精舍

壺闢跨天黨中有地仙鄉曲磴垂星斗危峯度石梁泉
聲當戶落藥氣入雲香何日同真隱來尋出世方

勉學書院侍父王應教

書幌晴開紫桂間，朝來滿座見青山。
茶煙織樹微分縷，竹色依簾更著斑。
風散百花隨仗下，天空雙鶴帶雲還。
談經晝永聞清讌，几席時時奉睿顏。

送呂中甫還四明和程太守韻

復看征橐去匆匆，況是春山暮。
雪中舊社音書王屋下，老年杖履鏡湖東。
金鷺樓隱滄洲，月木阜松含碧落。
風別後有懷誰共寫，祇應惆悵數南鴻。

保定惠順王珵坦

春日游柏谷寺

曉霧危巖合煙蘿反徑懸浮圖開佛日沙界接人天獨
鶴衝雲起愁猿枕石眠逃禪如可醉莫負杖頭錢

上已侍王駕登五龍山應教

鸞輶乘春攬物華翩翩千騎擁朝霞翠陰不斷松開幕
香靄平分樹吐花地主龍君迎羽蓋山靈玉女獻胡麻
憑高指顧提封遍睿藻千年壯帝家

沁水昭定王恬衍

春日閑述

睡起情逾嬾，煙蘿地自迷。
開尊惜遲暮，片月挂松西。

沁水王珵堦

彰法寺

嶽勢何穹窿，躋攀竟日至。
絕澗來巖椒，沿洄轉幽邃。
其陽開招提，不知幾千歲。
宮殿羅虛空，俯視下無地。
樵子雲際行，石磬風前墜。
境凝兜率天，巖紀司空字。
日晏憺

忘歸暫遠塵煩累

肅靖王真於

步虛詞二首

瑤壇深處磬聲微羽客朝元午夜歸杳杳三山青鳥過
翩翩雙鳥綠鳬飛島間月色明珠樹洞裏丹光透玉扉
佩劍幾回翔碧落天風吹冷六銖衣

綵霞琪樹共氤氳七色斑虬駕鶴羣玉佩冷搖滄海月
霓裳晴帶絳霄雲碧桃花綻春方永金鼎丹成火自焚

清夜朝元向天闕空歌聲在始清聞

春日田家

屋後青山門外溪小橋遙接稻秧畦人家遠近蒼煙裏
桑柘陰陰戴勝啼

趙康王厚煜

擬秋夜長

漫漫秋夜長唧唧寒螢吟白露下青草悠悠傷我心傷
心耿不寐孤坐鳴素琴朱絃中斷絕轉軫悲餘音推琴

步微月仰見雙飛禽
緬懷牧犢子潛潛淚沾襟
丰神宛

如在悵望空梁陰

送勾吳茂才顧聖少北上

北去渡滹沱春風一騎過入燕投刺少留趙著書多明
月頻呼酒青天獨放歌他時望南國湖上有煙蘿

七夕後作

銀河昨夜渡牽牛玉露涼侵院院秋一葉芭蕉數聲雨
人間何事不堪愁

宮詞

薄鬢斜鬟十五餘
妝成猶未下庭除
納涼記得君王作
私把泥金小扇書

百卉亭聯句

吾家亭子百花園簾捲東風蝴蝶飛
枕易斗酒十千須盡

興滿園春色照人衣

謝

遲日微風作好春
漫將詩句報花神
枕易樽前特上河間

頌松柏千年伴主人

謝

益莊王厚燧

春鴈

北上三湘路南辭七澤雲已甘同出塞不忍更離羣永
夜空中唳幽人枕上聞汀洲爭宿處昧旦起紛紛

早秋

庭樹初飛葉天高爽氣澄檻花藏晚蝶簾竹聚秋蠅紅
熟枝頭棗青浮水面菱金風蘋末起頓喜失炎蒸

新晴

連旬淫雨降今喜見朝暾徑路泥猶滑池塘水尚渾輪
蹄喧野市網罟曬漁村風埽殘雲斂青山復對門

蜀成王讓相

玉階怨

落日下西苑深宮風雨多定嫌蒼蘚滑玉輦不曾過

春日

明窗長晝獨從容單袷閑來坐暖風朱戶柳晴鶯未語
閑階苔淨蟻相攻茸草色吟邊綠灼灼花籌酒裏紅

春事近來渾不管楊花飄泊畫樓東

早秋

郊原正早秋露下蘆汀濕忽見一禽來只傍疎枝立

擬古宮詞

玉露侵階點翠苔金波穿牖共徘徊潛身坐倚梧桐樹
待學吹簫等鳳來

綺窗垂柳影婆娑長日花磚未肯過六院不通人語寂

一雙鸕鷀巧言多

北斗闌干夜未央
金爐侍女更添香
穿窗月射鴛鴦枕
半隱燈光在小牀

內池春水鴨頭綠
上苑晨花猩血紅
蜂蝶叢花鴛戲水
一齊著意向東風

漏殘雞唱曙光時
璧月穿花影漸移
欲畫愁眉羞對鏡
黃鸝飛上萬年枝

宮牆西望對殘霞
結陣翩飛遠暮鴉
簾幕飄搖風動處

有情雙燕自歸家

綠竹翛翛隔短牆
黃昏淒雨灑瀟湘
夢回窗掩銀缸冷

蟋蟀聲中秋夜長

光澤榮端王寵瀼

登仲宣樓懷古

憶昔登樓日天涯
事轉違計依劉表
得書授蔡邕稀南
國方羈旅西京未解圍
秦川空在眼公子乃忘歸

衡陽安懿王寵淹

登仲宣樓懷古

尋芳踐嘉約乘暇一登樓野樹連雲合清江繞郭流遺
文鄴下重舊井峴山留洵美開襟地無妨續勝遊

永壽恭和王秉檜

己卯九日登詵經臺

隱隱棲臺雲外重一溪活水過仙宮上師已化青牛老
萬木驚秋墜晚風

武岡保康王顯槐

次鄒卹部頴泉謝宴

小園一雨足次第百花開江白孤舟去天青一鳥來林
香時撲坐柳色競侵杯借問西鄰客懷人日幾回

慶成王慎鍾

夏日登萬佛樓次朱使君韻

天半峩峩峻閣開自公多暇興悠哉憑虛幾見空王在
結夏誰招使者來貝葉迎風翻鹿苑香雲散雨落蜂臺
倚闌欲和陽春曲慚愧登高作賦才

鄭世子載

補亡詩

南陔有風吹彼苞棘厥景婆娑欲靜弗得孝子事親當竭其力父母之恩昊天罔極

南陔有風吹彼桑梓慕我父母終身敬止曷哉伯仲以及娣姒恪爾晨昏絜爾甘旨

景薄桑榆日亦云暮父母俱存兄弟無故雖有至樂寧不深慮一則以喜一則以懼

右南陔三首

嗟彼白華瑩然如玉君子立身必慎其獨無貽親辱

嗟彼白華瑩然如琇君子立身必謹所守無貽親咎

嗟彼白華瑩然如霜君子立身如圭如璋為親之光

嗟彼白華瑩然如雪君子立身清清絜絜庶無玷缺

嗟彼白華瑩然如冰君子立身戰戰兢兢庶無怨憎

右白華五首

彼華者黍彼實者稷相彼秋成時萬時億

彼華者黍彼實者麥時和歲豐囷盈倉積

彼華者黍彼實者菽農夫之慶邦家之福

彼華者黍彼實者麻君子愛民不驕不奢

彼華者黍彼實者禾君子愛物不溢不過

右華黍五首

天運元亨萬物由庚王道正直蕩蕩平平

寒暑以序雨暘以時百穀用成庶績咸熙

草木蕃庶鳥獸咸若仰覩鶩飛俯窺魚躍

習習景風甘雨其濛醴泉洶洶玉燭融融

右由庚四首

瞻彼崇丘積土成高相彼大海積水成濤

卷石積多其形嵯峨勺水積久勢若江河

寶藏貨財靡所不足積善之家必有餘福

鳥獸魚龍咸遂其性積善之家必有餘慶

右崇丘四首

肅肅令儀君子由之秩秩彝倫君子求之率性之道君

子修之

何謂彝倫父子有親君臣有義朋友有信兄愛弟敬夫
和妻順

君令臣恭父慈子孝夫妻相敬兄弟相好惠于朋友無
德不報

維物有則維民秉彝好斯美德由此令儀上和下睦皞

皞熙熙

右由儀四首

安流

夏夜寄懷謝山人時客汾陽

良夜孤清賞懷君倍黯然客星一以別明月幾回圓紫
塞雲邊樹青山雨後天相思何處寫隨意有冰絃

送李子和山人遊西蜀

諭蜀文誰著風流漢長卿欲投巴子國定向錦官城羸
馬衝山色哀猿雜樹聲武侯遺廟在瞻謁重含情

宗正睦擇

送舜符

疇昔慕遊遨與君數朝夕稍申初服懷共結沉冥跡促膝究微言披情閱仙籍盼昧恣丘樊留連眷泉石星霜歛雲變婉孌成離折撫景念夙懼即事興今戚末路誰能同素心不可易淒淒冬日黃渺渺寒流碧暫舍故園林遠適京華陌時有北風來因聲慰岑寂

晚秋過相國寺懷然上人

與君結靜因回首俱陳迹緬憶山中遊歲景倏已夕秋颯颯空林澹月來寒石兀坐亦何言含情念疇昔

荅田六深甫鄭二信之過波上

豈是談經所真成載酒廬竹停仙客騎花鶯孝廉車秉
燭驚山鳥調琴出浦魚悠然對孤嶼宛在水中居

汴上逢李東因寄李二素甫

端坐意不適夏林颯已秋忽逢關外使暫緩望中憂野
日回殘照池煙澹夕流懷君欲何語獨上竹西樓

送朱生游德安兼簡蔡太守

送爾之南國清宵戀別觴詞人江左客刺史漢中郎碧

柳臨官道秋蘭遶郡堂遙知講經處賡和有新章

送鄭處士信之還歙因憶昔同遊諸君子

同和日云稀憐君復遠違青山雙屐在白首一帆歸野
燒浮殘雨寒林散夕暉因茲憶疇昔相對各沾衣

吹臺上送李東還關中兼寄李素甫孝廉

臺前洛陽路送爾向秦年豈意歌吟地真成邂逅筵寒
花然暮雨落葉亂秋煙為語同袍友相思實黯然

送鳴虛弟卜居長葛

濠客觀泉興屈原行澤篇憐余黃髮暮羨爾白眉賢落葉荒城畔寒花別路前惠連春草句先已郡人傳

聞明卿補高州

十年載筆侍楓宸萬里分符向海瀨共擬禁庭思長孺
莫尋湘水弔靈均三山桂發煙中色五嶺花生雪裏春
此去誰言留滯久君恩先到泣珠人

明卿行父道函諸公枉過陂上分韻得煙字

子子千旄雜暮煙浚郊千載尚依然紫扉近接鷗汀側

草閣平臨雉堞前綠柳影含新駐舫碧芸香護舊題篇
夜分把臂酣歌地細雨青燈似昔年

秋日陪文谷翠巖二省使燕東書堂應教

邸第張筵日秋風薦早涼地當清洛外臺接紫雲傍綺
席仙儔集瑤階大樂張坐移淮桂影身佩楚蘭芳卿月
淹今夕文星聚此堂圖書披篋笥詞賦入笙簧自愧非
放馬賡歌廁鴈行

立春日紀山西石二使君陳程二閩帥邀遊吹

臺同張職方賦

駒馬尋芳出高臺野望同人皆惠連輞地即孝王宮宴
對幽林雪歌餘大國風斷垣蒼蘚合遺沼碧流通日轉
平蕪外春歸遠樹中今朝逢賦客懷古意何窮

送邢憲僉入賀

憲使趨京邑旌旗指上台霜威驅溽暑雨色淨氛埃長
樂陳仙樂承明捧壽杯御爐香欲散宮扇影初開獻頌
封人意匡時國士才向來廷諱地瞻戀獨遲迴

早春大中丞同川李公見訪詢及陂上舊遊處

賦此奉簡二首

陂塘春至綠波生
講肆蕭然對古城
多謝故人頻問訊
渚蘭汀樹正含情

清溪自分老漁竿
白首忻逢舊豸冠
蘆葉裡華最深處
艤舟猶記昔時歡

席上送樵村兵憲西亭

雲黃沙白靜邊州
萬里風煙屬上游
幸值清時無所事

且從射獵海西頭

輔國中尉睦橫

送春

風吹飛絮點池蘋
無那傷春又送春
試上驛樓高處望
落花無主更愁人

奉國將軍勤叱

學仙

學仙貴養氣舉世少其真放之彌六合返則在吾身日

月卒有毀藥石寧足珍非吾好妖妄但為知者陳巖穴
亦多誤不獨朝市人

朝壇

郊居雜興

杏花漠漠柳參參路出隋堤十里南一夜水深三十尺
朝來網罟集深潭

慶槩

秋日送李文仲訪友新安

正值悲搖落那堪送客舟白雲江上晚紅樹驛邊秋細雨潤琴慢涼風添酒籌逢迎有知已暇日即登樓

承綵

春暮集巨源弟羣鷗閣

客來情不淺月白興逾長開閣驚春暮傳杯惜衆芳水清魚戲藻花落蝶愁香翦燭西窗裏無妨入醉鄉

送茅平仲

置酒長干路譚深夜未闌山川牽恨遠風雨逼年殘天

迴孤帆沒江空獨鴈寒從茲君別去月共幾時看

鎮國中尉多熲

雨

觸石陰霞北嶺遙逗風寒雨入簷飄天涯故舊惟孤枕
篋裏衣裳紙敝貂綻雪蘆花紛厯厯經霜楓葉莽蕭蕭
還應撼郭濤聲急只怪空江上夜潮

奉國將軍多熲

送蔡氏

為別既不易贈言良獨難小人各自媚君子乃憂歎投
漆必以膠合椒必以蘭子其寧爾心失意古所安

酬方于魯以製墨見寄

漢室隃糜香魏臺石螺色東海元夸使翰林子墨客此
時落手金不渝無事臨池水應黑阿圭阿谷久無光處
士千秋擅古方不博一枰獅子注且留十襲豹皮囊回
頭笑指窗前女今日雙蛾畫較長

春日懷張羽玉

言旋南嶽駕又作薊門行尊酒不為別河梁空復情一

官羈萬里十口寄孤城日暮春雲起相思處處生

七月七日曠書中庭得吳明卿書報謝

捫腹非經笥中庭曝舊書殷生慙半豹楚使慰雙魚委
曲存加飯綢繆問卜居欲知旋袖地近得比園廬

偕方仲美宗良兄再集宛在亭

一曲君恩重千秋賀監才亭虛水禽集池淨藕花開進
艇涼風送鈎簾返照來誰能與朋好到此不銜杯

過永叔郊居二首

王郎讀書處何異輞川莊竹舞風稍亂葵烹露葉香哦
詩迷鹿柴洗硯據魚梁久坐春陰合傾杯送夕陽

雄鳩啼不歇客散近黃昏蠟屐黏香絮單衣繡雨痕炊
煙尋去徑社鼓望前村半道牛車至爭馳入郭門

智公在永寧寺檢藏

玄度繙經後支郎卓錫餘蓮花重結社蕉葉與供書半
偈參香象千函校魯魚此中如斷酒那得住籃輿

送閔壽卿之金山

遊客去欲盡送君瀕歲除身投閑士宅口授異人書卧
榻禪燈古吟窗水月虛時臨洗硯處芳訊付雙魚

送沈子健之餘杭簿

苔水分西浙餘杭更向西郵餐供海錯縣鼓候潮雞風
壤吳趨接征徭繭簇齊由拳紙價賤鄉信日堪題

同趙汝邁漆中甫二太史宿張明成司業東郊

別墅分賦

徙倚步郊垌西山黯翠屏春醪麴塵綠晚飯燭花青小
隱叢生桂浮踪一聚萍疾邪焉用賦甘學古沉冥

對雨

苦雨何曾歇愁陰暗不開春寒緇氏嶺雲暮楚王臺戲
水飢鳶過褰簾濕燕來靜看雙屐齒無事長莓苔

寄黎君寔司訓

君才不薄廣文官依舊青壇一片寒家近郵筒傳自數
地偏書籍借應難懷人夜雨蘚蕪草留客春風苜蓿盤

聞道出游堪累月祇餘山色滿吟鞍

移居二首

屋上青山半隔城門前林木有餘清
林連北郭藏春色水過東家作雨聲
薄祿藜羹堪養老閑身竹素最鍾情
人嘲寂寞揚雄宅自笑玄經草未成

幾車書籍重新遭繞架殷勤手自編
一世蠹魚同出入千秋鴻寶足留連
揮毫隔竹蕭蕭雨洗墨臨池澹澹煙
熟讀離騷還痛飲積然猶藉古人眠

周國雍參藩寄紅罽衣賦此為謝

萬里蠶叢亦浣紗使君緘贈自三巴濯殘秋水天孫錦
染盡春山望帝花嬾集芰荷成短褐閑過祇樹混袈裟
相思幾上江邊閣却捲朱簾坐暮霞

送顧朝肅出守虔州

頓息青驄駕紫駒竹符新剖治虔州署中望闕孤臺聳
江上行春二水流氣候不齊連嶺海土風相雜半閩甌
停車試問廉泉在要識澄清顧醴侯

曝書畫見故人梁思伯遺翰不勝懷舊之感

逼除行舸繫江干盤礴津津到夜闌雨雪漫題詩閣去
河山遂隔酒鑪寒延陵有劍徒心許南海無珠作淚彈
素練淋漓褐數幅悲來開篋幾迴看

送徐朝直水部奏績入都

新涼澈徂暑徒御戒宵征煙柳辭鳩署星榆集鳳城書
名注上考聯步切西清袞職期山甫金錢計水衡九門
遲漏箭三殿緩鐘聲待旦應多暇抽毫賦二京

詠宗良兄齋頭佛手柑

春雨空花散秋霜碩果低牽枝出纖素隔葉卷柔荑指
豎禪師悟拳開法嗣迷疑將灑甘露似欲攬伽梨色現
黃金界香分肉麝臍願從靈運後接引證菩提

送雷元亮赴國學

浦口餘春水舟前換夏雲黃鸝低度曲綠蟻易成醺去
鼓橋門篋行談虎觀文曉鞍宮月引宵枕禁鐘聞紈扇
窺裁雪虞絃聽奏薰但教逢得意寧復歎離羣

送高汝謙廉訪之蜀

叱馭王程急何辭棧道難刀州開憲府劍閣擁詞壇一
水縈巴字層城壯錦官魚嘗丙穴美書發酉陽看風采
名先動霜威暑亦寒褰帷諭父老爭覩惠文冠

別何主臣之金陵兼東歐水部

桂樹來攀雪滿枝芙蓉去采月臨池憑將蟬雀新園扇
與乞江東水部詩

送梁傳之從襄陽將母南還

夫人城外漢江平，逐子南迴五兩輕。
路出鄖卽頻雨雪，

槎頭魚賤筍初生

送王姬還芝城

靡蕪芽碧柳絲黃，來往扁舟就沈郎。
一掬宮亭清淺水，凌波不怨洛川長。

泊長蕩

蒹葭一望暮蒼蒼，長蕩湖頭煙水長。
怪道今朝楓葉盡，

夜來七十二橋霜

湖口縣

湖水澄清江水渾江煙湖靄易黃昏請看湖口江心月

一片寒光照縣門

清明湖上

湖畔行吟日未斜四年三度客天涯不知鶲鶲驚飛去
穿破來禽滿樹花

多燠

秋日社集

躡步出郭門涼沙朗朝日迤邐入叢林花宮眩丹漆巍

巍豫章臺萬木四排比

音必從白
香山讀

高讌集友于討論及

刊述清風吹素襟古調和瑤瑟會心豈在遠快意亦多

術遙睇天際帆翩翩若風乙

謀揮

白下集沈生予明府席上賦得春草

芳杜奪幽色秦淮客路遙青連邀笛步綠鎖賽工橋柔
雨生三徑殘煙認六朝夢歸南浦東幾箇別魂消

雨卧

不睡愛聽雨雨聲聽不明莫能新夢去怕有舊愁生

就鷺峰寺宿同喻宣仲王曰常郭伏生作

鷺嶺幽僧借竹房熏籠茗椀坐繩牀夜長何必求歸夢

凍雨疎燈話故鄉

中尉謀堵

送黃貞父入覲

脂車秣良駟冠蓋如雲浮駕言趨上京述職遵諸侯王

事既有程肅肅途路修及茲正元初奉璋觀宸旒君抱
廊廟姿高視徧九州出兼卓魯聲入與夔龍游翔螭作
時雨膏澤布陵丘壇石百里城豈足長淹留揆予慕高
義夢想託綢繆賦詩申素衷跋蹠翰墨儕清風播蘭茝
令德樹千秋願崇華岱尊黃髮長優游

送姚龍文還永嘉

百卉懷芬芳當春欣所觀時風和且柔好鳥鳴其間萬
彙何熙熙我思獨盤桓良友當遠別惜此會面難握手

臨郊衢一往莫可攀願得少須臾言笑暫為歡母金玉
爾音慰我遲暮顏

贈康侯弟

羨君三十早登壇電戟霜戈走筆端秀句驚人時戛玉
清言對客總如蘭題迴酒頌非緣醉賦就郊居肯借看
幾度西堂春草夢殊令康樂作兄難

訪康侯弟郊園

郊居絕似沈休文戢羽藏鱗遠世氛堂下紫蘭新過雨

檐前綠樹半侵雲
酌來茗飲多清韻
譚到圖書得異聞
不為愛閑能到此
祇緣累月惜離羣

燕至

芳草無數綠雜花相間紅
誰將雙燕來一一舞春風

謀晉

五言今體詩

江邊一馬地遙出北壇門
蕭寺沙侵岸陶家火隔村
半峯藏小閣獨樹映高原
身外叨卑祿畊桑亦主恩

五畝閑畊罷童丁力更饒谷暄分虎茨溪暖種魚苗梅
岸一村雨斧泥三尺潮往來乘小艇因斷竹西橋

南溪種圃處風雨日淒清老樹作人語嘉蓮同佛名蠶
絲籬落長蝸角土垣生蕪穢今難治何勞拊缶聲

終日雲林下圖書隱几中天容一身拙世忌兩眉工雀
散稻田雨蟬鳴柳巷風相過無約束白首灌園翁

城郭歸來遠山齋閑晚煙窗蟲浮研水壁鼠敗琴絃舊
社書堪借寒宵燭可然布裘霜氣入未疊木花棉

野曠孤扉靜村寒雨雪多牛閑牧豎卧犬吠里胥過落
落朱門夢寥寥白石歌茅簷候晴日竹裏綻農蓑

送僧游紫蓋後入西粵

桂嶺行踪遠東歸定幾年破頭山下寺斷臂雪中禪乞
食依蠻店焚香上客船匡廬僧院在門閉虎溪泉

春日同無垢兄酬履直諸兄弟見訪

郊垌數椽屋兄弟隱相依誰鼓滄江棹來尋白版扉水
香蘋葉長村冷杏花稀自喜能留客開軒有翠微

冬日同胡實美宿銘公禪室

寺外溪水落溪田如掌平門稀車馬跡林隱木魚聲行
道石猶古轉經窗自明寒雲常借榻戶口有柴荆

李宗衍

郢曲無人和君操正始音閣書閑自較池墨醉能臨態
近嵇中散名多李伯禽庭花春滿檻曾倚雪兒唶

甲寅春日江村即事

一曲清江舊草堂野人原自愛滄浪豈因俸薄輕中壘

敢謂風高卧上皇。雨後看山初埽徑。日斜臨水更移牀。
門前欲種桃千樹。看取花枝過短牆。

隱囊紗帽燕居時。草閣疎簾對曲池。松待晴雲梳短髮。
梅經凍雨折。高枝沙禽自濯鳧。翁沒水纏方喧烏賊知。
落日郊原看野色。綠波春浦怨江蘿。

水市沙墟地更偏。卑樓無用買山錢。荒厨慣乞漁家火。
行李時登估客船。鐵柱江聲連野郭。香爐雲氣隔湖天。
游踪到處堪經月。豈待男婚女嫁年。

自喜幽居耳目清閑中歲月與天爭占風網客知魚信
較雨田家驗鵲聲梅潤上絃琴緩柱草香侵局弈開枰
沙邊引步看流水何處昏鐘報曉晴

農家月令重陰晴每看春圖記五行稻圃雨多嫌穀日
麥田風最怯清明占烏舊信江南俗叱犢時聞谷口聲
村市朝來競簫鼓朱幡使者遠催耕

一月愁霖惟伏枕空齋破榻擁青綾春深隴坂難停策
晏起鄰家始挂曆草長宜男憂未解鳩聞逐婦恨偏增

落花誰埽門前路乞食遙過五老僧

綠水園亭白版扉輪蹄出郭到應稀江雷乍殷龍兒長
社日初晴燕子飛飯熟東田觀午餧酒香西舍典春衣
長堤何處無芳草莫怨山中客未歸

山靜江深岸擁沙晴絲百尺裏空斜荒村小犬朝隨汲
閑院游蜂晚報衙病後僧貽廬嶽杖雨前人寄慢亭茶
竹煙新瓦南窗下自煮洪崖石乳花

晚晴閑出薜蘿門江漲新添野水渾山映春旗沽酒市

沙埋破舫打魚村
棟花開後過風信
竹籜飄時帶雨痕
漂母相逢應見問
淮陰城下舊王孫

江村負郭坂田多
田舍風光草樹和
孤鳥立殘牛背雨
小魚吹散鴨頭波
買山恐被高僧笑
擊壤閒聽老父歌
猶幸代畊餘薄祿
門無胥吏夜催科

即席賦得霜葉紅於二月花

霜天楓葉林中色
試較春風枝上花
千點亂飛仍似雨
一堤掩映欲成霞
水邊朱戶秋煙暝
山外丹梯晚照斜

却笑東皇雖有意不如青女著鉛華

柳

二十八星中有名千枝萬樹綰離情暖風拂地條初弱
寒雨連空葉漸生半倚紅亭江北岸低藏粉堞漢南城
綠陰高處春光暮吹送新蟬四五聲

苔

布葉如錢箇箇青不爭要路占閑庭風前印鶴移罝步
雨後留蝶作篆形生閣久縈詞客恨入碑多蝕古人銘

紅英墮地交相映小屐跕然未忍停

寄賀文湛持入東閣

焚魚學士最清華五世承恩太史家歸沐不言溫室樹
入朝時草內廷麻吳中舊宅卑依市都下新堤淺築沙
儻為故人炊脫粟青門來種邵平瓜

謀塚

九日誠甫宗侯招登明遠樓讌集分韻得無字
有約登樓興不殊天涯朋好接歡娛寒生南浦楓初落

秋入東籬菊尚無詩派西江存大雅賓筵左顧敷中厨
風前剩有參軍帽醉後終須倩客扶

謀圭

秋日龍沙社集

結駟城外游眷此郊原靜崎嶇陟龍沙悠然見西嶺風
日暢幽懷煙光澹雲影松門初地開清磬出禪境黃菊
籬下繁紅芙蓉末冷心目既雙清和歌荅佳景擾擾塵

壇中真樂誰其領

鎮國中尉觀爐

送毛教授還山

未老思投老欲歸便得歸繙塵今漸遠不上芰荷衣

鎮國中尉頤塚

登兗州城樓

步上西城樓北望傷我心秋風吹大陸落日薊門陰玄
霜被寒渚白鴈號中林孤飛何栖止嗷嗷悲不禁怵惕
結心曲歸寫丘中琴朱絃感人意悽然發哀音中夜不

能寐撫桐獨沉吟

寄懷邢子愿侍御

相憶未相識高名空復聞時因薊北鴈一望濟南雲謝傳青山屐羊欣白練裙風流誰可再千載獨夫君

賦得為我彈鳴琴贈王生

憐君多雅調為我彈鳴琴曠矣丘中賞兼之物外心夜深山鬼泣江淨水龍吟曲罷無人解松風披素襟

蟋蟀

蟋蟀關何事哀音入夜偏寥寥閑永漏切切亂鳴絃乍
逐微風斷還從疎雨連閨中有思婦怪爾不成眠

敬鉗

江村雨夜

驟雨連山黑荒村夜色侵瀟瀟霑暗壁颯颯動秋林江
鴈濕難度草蟲寒更吟愁人當此夕寂寞倍關心

誼斗

題旅舍

空有千金意難酬一飯恩再來逢漂母不復念王孫

鎮國中尉碩勵

送王山人游三楚

門前楊柳樹風亂麴塵絲日暮臨溪別春帆適楚時人
煙揚子渡山木偃王祠處處生芳草悠悠千里思

郊居

結屋臨溪水悠然心自閑泉分杯底月雲共枕前山芳
樹經春合幽禽薄暮還鄰人借漁釣噭爾款柴關

訪張茂才時甫不值

尋君復不遇長嘯出林間草滿池中水蓬高屋外山夕
陽看鳥盡秋色任雲閑愛爾幽居好歸來亦閉關

答寄歐楨伯水曹

聞醉金陵酒高歌李白樓書來牛渚夕賦罷鳳臺秋徑
竹裁青簡江花照綺裘從來何水部頭白尚風流

惜昔

清淮濁酒憶同舟回首風煙又感秋一朶行雲傾下蔡

半帆殘月。按涼州吐茵丞相何曾惱翦袖佳人不解愁。

紅燭半銷芸榻曙夢回行露濕箜篌。

秋日聞鶯 束允治

秋鶯嚙嚙雨如絲曉入西園獨聽時回首綠楊搖落盡
數聲還上萬年枝。

紀夢

一夜西風玉枕涼夢回明月在橫塘分明記得相逢地
笑隔荷花喚阿郎。

金谷園

花落樓空委翠塵千秋明月恨長新西風原上羣芳歇
獨有芙蓉似美人

春日懷長安故人

美人遙憶鳳城西芳草年年路欲迷今日出門春已半
櫻花如霰曉鶯啼

器封

均州樂二首

真人宮對青樓起面面青樓俯江水樓上箜篌樓下船
大堤花暖漢江煙漢江估客青樓妾十五蛾眉嬌可憐
白銅小唱黃金縷對客還成可憐語廬頭客醉不留行
明道參峰望雲雨

臨江賈人黃篾船涴涴青油篙刺天下船上岸買魚酒
二八當爐誇數錢煙縈羅幌春將晚白日銜山不思返
珠簾紅袖影僂俄樓上明粧樓下波沙棠樹上嬌春鳥
月出平江齊唱歌

寄田子藝

芙蓉搖落寄何遲遠道猶涵玉露滋山遶
穆陵秋蠶蟲月明澗水夜離離繙經臺畔一燈寂
撻鼓樓前雙杵悲無奈西風吹病骨因君將賦五游詩

夜渡小江口宿丹崖趙氏寄懷李子田太史

平沙為席石為幢歇馬呼船夜渡江雙槳煙迷青草激
九霄月傍綠芸窗門前題字過丹穴客裏逢春覆玉缸
覓爾深山讀書處幽居長羨鹿門龐

鎮國將軍恬熒

送吳平川判府致政歸桐城

歸路東風晚悽心向夕煙青山相送日白首倦游年人
渡春江上帆飛暮雨前知君投老去生事在林泉

鎮國將軍恬熒

感遇

候蟲鳴虛堂明月照高樹佳人不我過相思隔雲路人
生無百齡奄忽若朝露努力求功名名成髮已素窮通

各有時達人守天賦

過柏谷山英上人舊居

袈裟掛壁錫依臺寂寞空門生碧苔坐久不聞鐘磬響

滿庭殘月杏花開

輔國將軍程瑠

長信怨

永巷風偏入深宮月易斜空牀愁獨守中夜起長嗟託
意題團扇驚心見落花思君情不極惆悵減容華

輔國將軍琨

芳樹

嘉樹晝芳菲重重在春苑風來翠幄褰日映朱簾卷嫩
萼正歲遲柔枝亦纏綿不惜與君攀無令歲華晚

輔國將軍琨

從軍行

日落戍龍庭風多牧馬鳴平沙但衰草百里見孤城

再逢友人

道遠頻馳夢情深祇寄書相逢俱淚下翻似別離初

奉國將軍效錫

夏日讌伯王園

避暑梁王苑樓深翠竹間風生三徑爽日映八窗闢作賦依芳沼開尊對遠山中林容小阮醉後未言還

常法

古怨

妾思亂如絲纏縵無斷絕難將摻摻手解得心中結

欽定四庫全書

御選明詩

卷二

五

御選明詩卷二



總校官庶吉士臣侍朝
校對官檢討臣蕭九成
謄錄貢生臣江長鑑